

四庫全書

史部

欽定四庫全書

欽定日下舊聞考卷一百二十九

京畿 涿州三

原去樓桑村三里為酈村酈道元故居也

名勝志

臣等謹按今樓桑村北三里許有道元村

增乾隆二十七年

御製題酈道元故居詩 注水經曾卅卷成紫淵勝處

最分明果然在涿惟言涿地附青雲也立名

臣等謹按 酈道元故居

御製詩恭載首見之篇餘不備錄

原桃水首受涑水於徐城合於聖水始匯范水城西

桃莊以此名

名勝志

原桃莊在州西北一里張桓侯舊里也

涑州志

臣等謹按州西舊有桃莊已沒入河水中高處尚

傳為桃莊遺址云桓侯舊里在州西南十里忠義

店有專祠在官路東距廟數武有石碣二一曰桓

侯故里一曰桓侯故井井已湮又黃圖雜志云侯廟有二一在城內一在城外今城內無專祠城南郭有遺址而已

補涿州張桓侯廟有二一在城內一在城外

黃圖雜志

補陳懿典涿州重修張桓侯廟碑畧 漢車騎將軍張侯專祠在蜀涿州其所生之鄉州有廟舊矣方侯之從先主起也間關百戰艱險周旋身陷陣瀕危者數矣而卒以志興復九死不回及與諸葛亮沂江定蜀三分鼎建之業開拓為多作鎮巴西破張郃之衆曹操遠巡引退不敢復窺漢川庶幾哉可與關侯爭烈矣而侯氣吞吳魏方勃勃未已乃竟死帳下兵卒之手其志鬱而未伸其精爽必有不可磨滅者則侯

之有廟以奔走其鄉之父老子弟宜已然侯非獨勇烈茂也蓋亦有君子之風焉當搶攘中士皆從強大就功名侯獨依先主共事草昧孔明一出而居其上黃馬後起與並列關侯猶待費司馬之解而後釋然侯則退無後言又嘗降級而釋嚴顏此尤雄鷙者所難而侯獨能之以勞定國以死勤事侯誠合乎祀典者矣

吏

隱齋集

原盧植故宅在州東十五里地名盧家樂土壤肥饒

子孫世居焉

名勝志

臣等謹按盧植故宅無可考州境亦無盧家樂

地名惟城東南四里許有小村名盧家莊多盧姓

原盧氏姜姓齊文公子高高孫僕食采于盧濟北盧縣
是也其後因以為氏田和篡齊盧氏散居燕秦之間秦
有博士敖子孫家於涿水之上遂為范陽涿人裔孫植
子毓三傳生諶諶五子勗居巷南號南祖偃居北號北

祖唐宰相
世系表

增仙風坡在州北十二里舊志安樂窩宋邵康節先生

居此今為仙風坡

涿州志

臣等謹按元歐陽玄涿郡名賢碑記云邵雍其先

涿人今州西北十餘里有邵村謂即以安樂得名
又州西北十五里宣封坡舊有木坊書邵子講易
處據此則仙風係傳訛應從歐記作宣封為是

增乾隆十五年

御製安樂窩詩 前者周程後者朱同歸何礙却殊途
深知天地數蘊不作語言文字儒試想安貧樂道趣
常依月到風來湖嘯臺近在烟霄裏異世芝蘭結契無
臣等謹按安樂窩

御製詩恭載首見之篇餘不備錄

原金將完顏和卓監軍愛薪蘇赫以步兵萬二千人糧車五百輛援中都舒穆魯明安將三千騎往擊之遇于涿州宣封塞獲蘇赫和卓遁去盡得其輜重

元史本傳按和卓

滿洲語美好也舊作合佳今譯改按愛薪滿洲語金也蘇赫斧也舊作阿興鬆哥今譯改

臣等謹按據州志宣封塞即宣封坡

原范村在州西南宋宣和四年童貫伐遼至高陽關遣种師道總東路兵趨白溝辛興宗總西路兵趨范村既

而興宗至范村為遼人所敗

方輿紀要

原州西南三十里岐溝宋時置關以備遼者

長安客話

原岐溝距涿州西南四十里亦曰奇溝又曰祁溝唐末

設關于此晉王存勗天祐十年遣周德威出飛狐攻燕

與鎮定兵會于易水進攻祁溝關下之遂圍涿州守將

以城降宋雍熙三年曹彬米信等與遼將耶律休格戰于

岐溝關敗績彬等夜渡巨馬河南趨易州休格領精騎追

及弱者不可勝計宣和中亦嘗設關于此以備金

方輿紀要

臣等謹按岐溝關州志稱在州西三十里有土城環村之南北西三面當是其遺址

原關在巨馬河之北自關而西至易州六十里由巨馬河而東至新城縣四十里

通鑑注

原燕昭王臺在州西南五十里

涿州志

原臺東有三峯甚崇峻騰雲冠峯高霞翼嶺岫壑冲深

含煙鎖霧耆舊言燕昭王求神仙處也

元混一方輿勝覽

原昭祐靈惠公廟在州城東南隅

涿州志

原元夏以忠昭祐靈惠公廟碑記 涿郡城東南隅有古塚歸然世傳以為清河張公之墓公諱秀仕唐為馬軍兵馬使司寇大將軍檢校太子詹事安東副都護兼御史中丞鄧人麗其塋而祠之曰金甲將軍歲致祈禱尚矣又云墓嘗圯得金明昌六年石刻紀後漢將軍沒于是邑而葬焉其稱清河則一而或漢或唐則異圖牒湮廢莫決其孰是孰非也天曆年間近關不守已而嬰城得全人指以為神之功有司白于上始封為靈惠侯乞靈者日益廣神異亦日昭著不可殫紀至正十九年己亥春妖寇侵軼畿甸京師戒嚴徵調方殷遠邇騷動時諸將貪暴師冗無律數百里內掠人為糧郡邑率自殘毀惟涿州破豎將矯命利其有以三月戊午遽入據之民之膏其鼎鎔者日以千百計居十有五日而去人咸謂非神陰遣之必靡有孑遺矣請增秩于有司以答其貺命未及下諸軍之接壤而屯者相比歲飢餓餉不繼將以兵叛冀飽于涿者非一日明年庚子四月已

已城陷雖晡至夕適然剽掠焚蕩惻世驅以負荷者男女無
算又將割烹之莫不露禱祈善返越三日歸者餘五百人又
以為非神之力不及此申前之請益虔中書下其議太常遂
加昭祐之號而易爵以公命下郡人割牲醢酒以告范陽尹
鄭公侈其事屬命記之且曰吾赤子幸存神賜也嗟夫天地
儲精得五行之秀者為人其有聰明正直卓然不同于流俗
者則能立功名于當世垂事業于方來故其歿也則為明神
漢人所謂生封侯死廟食者是已且人之以禍福聽于神者
亦衰世之志也天道福善禍淫神豈能私予奪于其間哉因
其有神而禱之尚足以繫其遷善悔罪之心庶幾率德改行
焉爾祭法曰能禦大災者祀之能捍大患者祀之公之血食
于茲土也非所謂能禦大災捍大患耶聰明正直固不容以小
智窺之矣雖然神依人而壹者也向使顛連無告祈哀于庖
切之際而不因有以全之則將死徙無遺又何以得今日齋
明盛服以承祭祀如此其嚴乎鄭君大庸欲誌之于不朽者
豈徒以揭其報貺之虔殆著其民前日之感而勸其民後日

之無或怠也予前掌教于郡悉其
顛末故次第具事而書之

同上

增東嶽廟在北關玉女祠右

同上

補涿州北關東嶽廟規制敞麗萬歷二年慈聖宣文皇

太后勅修有張居正碑

留素
堂集

增張居正東嶽廟碑記 泰山為羣嶽長古之帝王莫
不秩祀之記所稱出雲為風雨民所取財用者也是其
威靈顯著功德廣大不惟惠及于一方而已且位在東
方職司善惡冥運陰陽可以左右人主賞罰之柄肝鬐
徵應由來遠矣涿州之北隅有東嶽廟成化戊戌純皇
帝命官鼎建拓地增宇迄今九十餘禩矣廟貌圯敝神
將弗享今上嗣登大寶祇奉聖母慈聖皇太后慈命特
出帑金于胡良巨馬二河各建一橋以利濟往來之衆

又以廟近於橋為涿人所依遂並神廟一新之命司禮
監太監馮保督理內官監太監劉濟董工財不取于賦
調役不假于官師人心競勸再閱月而告成中為顯應
之殿翼以司命炳靈左右又各為配殿一以祀嶽神東
為慈光廣朔宮以祀東嶽仙妃凡殿寢門闥亭觀廊廡
規制藻飾視舊有加而冕服帷帳幡幢供器以安神靈
者罔不畢具落成之日涿人奔走欣躍瞻眇動色遠來
祈祐者咸袂除齋慄無敢弗欽神靈莫安景貺昭答濟
濟翼翼若青都臨於近輔磐石移於京邑信羣望之會宗
方輿之勝境也夫大造之運歸於無朕顯於有赫后土
所載無不有人則無不有神司之君人者為民則設官
以治治之有弗能移者則藉神道以默相其間自生民
以來未有廢此者也今聖主用大道為治天下嚮風文
德四洽遠人來歸若無事於神者乃猶以懷柔之典有
舉不廢倘亦神道設教之意與今靈惟德馨仰篤慈佑
以保翊聖躬福庇下民俾淳風沕穆億千萬年則禦災

擇患允符祀典不為蹟矣工竣謹奉命記其顛末勒聲
詩以告成事辭曰東方曰仁萬物資始神惟岱宗實主
張是有赫威靈周流六虛涿鹿之原惟神所居琳宮
戢肇裡自古弗涓弗除神不安處惟皇御極懷柔百神
祇奉慈命用圖厥新既建虹橋遂作神宇拓其堂基施
及廊廡真儀崇設靈官景從珪幣醪醴式歲國容惟神
聰明保茲皇祚握圖膺籙如山之固敷錫下民時雨時
暘無有作惡敢干天常泰山巖巖京邑翼翼勅辭麗碑
岳祀萬億

涿州志

增佑濟龍神祠在涿州永濟橋東南

大清
一統志

臣等謹按

佑濟龍神祠乾隆二十六年奉

神貺臻數典庶無闕也議禮家謂

龍之祀自史記朝那龍湫始顯其文不秩於三代殊不知經訓所載山川能興雲雨致神物以為民庇者民必祈而報之近至一坊一庸尸祝索饗惟恐後矧涿郡地列望繁當九畿之會而胡良拒馬二水潯涵歆用衍潤我

神皋其必有以默相之也固宜或者疑有明已來水汎而橋圯匪一昔矣

神安于斯而不益懋夫人事耶則興梁為政之句足深
長思已繼自今若蓄洩在居者往來在行者尚其善保
厥成以永孚于

神庥而可哉橋記緣起已詳茲因祠石請文書以揭之
如此

原智度寺在城東北隅敝自唐時有舊碑刻其後即雲

居寺俱有石基浮圖

名勝志

原魏允中九日陪王邵判登涿州智度寺塔作悲風
涿鹿散吹笳寶刹凌空貯法華杖履天人穿百磴樓臺

幾旬俯千家登高興好難逢菊懷土愁深已及瓜
是大夫能作賦山川搖落不須嗟

伯仲連璧集

補城東三里普壽寺浮圖高十丈石基高二丈周圍二

百步泳郡山川之勝一覽俱在目前

名勝志

臣等謹按普壽寺一名清涼寺在城東北三里地
名北臺浮圖石臺俱存又寺中有萬曆時碑記傳
為宋太祖毓靈之所云

原城西南二十五里佑聖寺古槐有紫藤纏其上

名勝志

臣等謹按佑聖寺在岐溝北城下古槐紫藤今無

補涿州有靈椿寺寺中椿樹一本大不可量枝幹茂盛凡樹影皆隨日月升沈以為邪正而椿影早暮未嘗少

移故以名其寺

宦游紀聞

臣等謹按靈椿寺與樹今俱無考

增福聚寺在涿州北俠河村康熙五十四年

賜額

大清一統志

補范陽鳳池院尼童子年未二十濃艷明俊頗通賓游創作新眉輕纖不類時俗人以其佛弟子謂之淺文殊

眉清

異錄

臣等謹按鳳池院今無考

原崇元觀在涿州治北

明一統志

臣等謹按崇元觀俗呼黃柏觀已廢其地有殘碑
二一額題崇元廣化岳真人道行碑元劉賡撰文
一額題真大道教張真人道行碑元吳澄撰文俱
剝蝕其所云岳真人疑即道園學古錄所云真大
道第八代師岳真人也

補真大道第八代師曰岳真人諱德文涿州人始涿有

童謠云涿有八岳父老莫之解也後真人號岳祖蓋其

徵云

道園學古錄

原紫陽觀在州城內唐邊洞元修真于此白日上昇元

宗御製褒詞立碑

名勝志

補邊洞元者范陽女子幼而高潔仁慈好善每霜雪凝
涇鳥雀飢棲必求米穀以餒之歲月既深鳥省望而識
之或飛鳴前導或翔舞後隨年十五白其父母願得入
道父母未之許也既笄誓以不嫁奉養甘旨數年丁父

母憂毀瘠不食幾至滅性服闋詣郡中女官請為道士
治機杼紡織晝夜不懈性亦好服餌往往為藥所苦嘔
逆吐痢至於疲劇亦無所怨一旦有老叟負布囊入觀
賣藥衆問賣者何藥叟曰大還丹服之長生上仙叟面
目黧黑形容枯槁行走偃僂衆笑曰既服之長生何憔悴
若此耶遂巡暴風雷雨衆驚悸稍稍散去叟曰此間
有女道士好行陰德絕粒多年者何在或指其院以示
之叟入院徑至洞元前曰此有還丹大藥能服之乎洞

元驚喜延坐問藥須幾錢叟曰所值不多五十萬金耳
洞元曰窮窘無錢何以致藥叟曰勿憂子自幼及今四
十年矣三十年來積聚五穀餉飼禽蟲以此計之不啻
藥價也即開囊示之藥丸青黑色大如梧子者二三斗
令洞元自探之洞元所得三丸叟曰此丹服之易腸換
血十五日後方得升天乃中品也又於衣裾中解一合
子大如錢出少許藥如桃膠狀亦似桃香叟於井中汲
水調此令吞之謂曰子宜處臺閣之上七日可以升天

妻幽州女道士邊洞元也今日得道升天來辭陛下言訖冉冉而去乃詔問所部幽州亦驛騎馳奏與此符合勅其觀為登仙觀樓曰紫雲樓命校書郎王瑞敬之為

碑以紀其事

壩城集
仙錄

朱昆田原按廣異記以洞元為冀州棗強縣女道士所載上昇事亦不同夾漈鄭氏編藝文略有邊洞元升天記一卷從靈佑宮檢道藏未得其書不知記中主何說也

原涿州境東南有漢盧植墓土人呼為南臺金王寂詩
南臺故址今頽然漢盧植墓疑相傳植涿人先主嘗從

受學者也

長安客話

原盧植以初平三年卒臨困勅其子儉塋於土穴不用
槨附體單帛而已建安中曹操北討柳城過涿郡告守
令曰故北中郎將盧植名著海內學為儒宗士之楷模
國之賴幹也昔武王入殷封商容之閭鄭喪子產仲尼
隕涕孤到此州嘉其餘風春秋之義賢者之後宜有殊

禮亟遣丞掾除其墳墓存其子孫并致薄醑以張厥德

後漢

書

臣等謹按州志載盧植墓在州東河村長安客話亦云在州境東南土人呼為南臺今城東南四里許盧家莊稍北有荒阜徑丈餘高三尺許土人指為盧植墓墓旁有石半沒土中亦無字蹟可考

原范陽粉水口有一墓石虎石柱號文將軍冢晉安帝隆安中間邱南陽將塋婦於墓側是夕從者數十人皆

夢云何故厄人以自安覺說之人皆同雖心惡之恥為
夢迴及塋但鳴鼓角為聲勢聞墓上亦鼓角及鎧甲聲
及至墓死於墓門者三人即殮之後閭邱為楊佺期所
誅人以為文將軍之祟

太平
廣記

朱彛尊原按粉水不見地志諸書疑即汾門之譌
臣等謹按粉水口文將軍墓今無考

增袁天綱墓在涿州東北浮落岡

大清
一統志

增李淳風墓在州東北向陽里

涿州
志

原實禹鈞墓在州西團柳村

同上

原禹鈞仕後周為諫議大夫五子皆登第馮道贈詩燕

山實十郎教子有義方是也今涿州西二十里有禹鈞

墓人呼為十郎冢

長安客話

臣等謹按州志令團柳村北有河形舊名康河北岸上有荒邱微有梵形空缺處望之不盡其後有小穴以瓦石投之鏗然有聲土人呼為十郎塚今考墓前石碣為明正統時太監竇吉祥墓惟碣文

內稱吉祥為宋學士儀九世孫葬於康河之陽祖塋之次云

原實諫議禹鈞嘗因元夕往延慶寺燒香於後殿堦側拾得銀二百兩金三十兩遂持歸明旦清晨詣寺守候失物主須臾見一人涕泣至公問所因其人具以實告曰父犯刑至大辟徧懇至親貸得金若干將贖父罪昨暮以一相知置酒酒昏忽失去今父罪已不復贖矣

公驗其實遂與同歸以舊物還之

范文正別集

原實氏同宗及外姻貧困有喪不能自舉公為出金葬之由公塋者凡二十七喪親戚故舊遺孤有女未能嫁者公為出金嫁之由公嫁者孤女凡二十八人相知窘困由公活其族者數十家及公之亡有持心喪三年者

同上

原禹鈞五子儀儼侃偁僖儀至禮部尚書儼禮部侍郎皆為翰林學士侃左補闕侃左諫議大夫參知政事僖

起居郎

同上

原竇儀尚書本燕人家法整肅尚書每對客即二侍郎
三起居四參政五補闕皆侍立焉

談錄

原盧景裕字仲孺小字白頭專經為學居拒馬河將一

老婢作食妻子不自隨從

北史

原光熙元年五月范陽國地燃可以爨此火沴土也

五言書

五行志

補太宗泰常七年九月溫泉出於涿鹿人有風寒之疾

入者多愈

魏書靈徵志

原盧文偉善營理家素貧儉因此致富北方將亂文偉積稻穀於范陽城多所賑贍彌為鄉里所歸及韓樓據薊城文偉率鄉閭守范陽樓平除范陽太守

北史

原北齊天保八年議徙冀定瀛無田之人謂之樂遷於幽州范陽寬鄉以處之

隋書食貨志

臣等謹按寬鄉今無考

原周宣政元年幽州人盧昌期祖英伯等聚衆據范陽反詔宇文神舉率兵擒之齊黃門侍郎盧思道亦在反

中賊平見獲解衣將伏法神舉素欽其才名乃釋而禮

之即令草露布

後周書

原遼神冊六年十二月太祖圍涿州有白兔緣壘而上

是日破其郭

遼史太祖記

補太宗既平太原遂觀范陽得汾晉幽薊之馬凡四萬

二千餘匹

江表傳

補天聖中侍御史知雜事章頻使遼死遼無棺櫬舉至

范陽方就殮自後遼人常造數漆棺以銀飾之每有使

人入境則載以隨行至今為例

夢溪筆談

原遼于開寶七年涿州刺史耶律琮以書遺雄州孫全

興願講好於朝廷八年遣款附使克實克慎思奉書來

聘自是乃通使矣

職官分紀按克寔克舊作克沙骨今從八旗姓譜改

原雍熙三年三月辛巳曹彬克涿州乙酉曹彬敗遼于

涿州南殺其相和斯

宋史本紀按和斯蒙古語毀也舊作賀斯今譯改

原宋宣和四年金將郭藥師以州降賜郡名曰涿水升

威行軍節度

宋史志

補金人以山後諸郡不可守即移兵山前是時太祖經略山後諸州皆平自紫荆關領兵大入攻涿州州兵殊死戰晝夜急攻四十餘日拔之

魯國忠武王行錄

原蘇子由為賀遼生辰國信使在元祐四年八月子瞻有詩送之既至國人每問大蘇學士安否子由經涿州寄詩曰誰將家譜到燕都識底人人問大蘇莫把聲名動絕塞恐妨他日卧江湖子瞻得詩次韻云龜毳年來亦甚都時聞鳩舌問三蘇那知老病渾無用欲向君王

乞鏡湖聞曩時有刻石於使館者今無存矣

辛齊詩話

補衛公膚敏使金至涿州與呿哩布遇請相見問其儀以例對公笑曰所謂例者非趨伏羅拜乎皇子雖貴人臣也使者雖賤亦人臣也兩國之臣相見而僭君是一國二君也不祥莫大焉乃長揖而入

浮溪文粹

原涿州舊有塔在桑乾河中名鎮河塔嘉靖元年塔崩

內有古錢皆飛空如蝶自後河水不時汎溢

長安客話

臣等謹按鎮河塔址今亦無考

欽定日下舊聞考卷一百二十九舉正

張邵原書邵訛作邵今據三國志改

陳懿典涿州重修
張桓侯廟碑畧條

欽定日下舊聞考卷一百二十九舉正

欽定四庫全書

欽定日下舊聞考卷一百三十

京畿

房山縣一

原房山縣在涿州西北四十里東至順天府一百二十里本良鄉宛平范陽三縣地金大定二十九年始置萬

寧縣以奉山陵明昌二年改奉先縣

方輿紀要

臣等謹按房山縣明因元舊屬涿州

本朝屬順天府

增房山縣在順天府西南九十里東西距二百二十五里南北距八十二里東至良鄉縣界十二里西至易州涑水縣界二百四十里南至涿州界三十二里北至宛平縣界五十里東南至固安縣治九十里西南至涑水縣治一百里東北至宛平縣治九十里西北至宣化府

保安州治二百里

一統志 大清

原劉因過奉先縣詩
閏遼分宋統此志亦雄哉置縣名猶在因山勢已據百年元魏史千古汝南哀華表鶴應有悲風海上來
劉靜修集

崇至三丈

房山縣志

原元房山縣尹朱禮去思碑馬守恕撰文

房山縣志

增馬守恕縣尹朱公去思碑略自古治國家者以愛民為本由朝廷而路府以路府為親於民也由路府而州縣以州縣尤親於民也今縣尹秩同三代子男漢考治行尤異唐試書判理人策迨至聖元妙選守令為富今急務內外皆許保舉能者超陞擢用否者罰及舉主可謂考察勸課之有術任賢愛民之美意也夫房山乃京輔劇縣得撫治之道獲乎上悅其民不負選保委用者其惟朱公與公名禮字節文大都開陽里人也未冠之年喪父事母孝著鄉里學問優長修潔謙遜明習文法辭理閒雅自宣徽院擢用轉留守司掾調司獄司官歷有能績選京倉使羨餘糧二千一百石欽遇明詔選保守令內外交章薦舉吏部銓注從仕郎房山尹兼管

本縣諸軍興學勸農事公下車之日發號施令興利除害嚴禁吏卒革去擾民之弊慈愛百姓凡有所頒賦役置簿比驗貧富科攤均平而民不敢稽緩其限田界審其侵奪者經正之獄訟察其可疑者明辨之戶婚久未決者隨判之盜賊有未獲者催捕之孝弟事於父兄者勸賞之豪猾橫於鄉里者威振之撫治踰月民心大悅至正五年冬十月中興庫提典引校尉數員稱資政院委官和買木炭逐年節次不下十數萬斤侵漁百姓結舌吞聲無可審訴公審知其弊赴上陳告蒙擬本院合屬收買其他怙恃權勢者聞之相戒絕不敢以非禮犯也是年獵者百餘人指稱飛放徧擾鄉民公問之曰此縣隈山傍嶺並無水泊何嘗有天鵝鷓鴣飛落耶獵人無辭出縣互勘曰朱縣令有愛民之誠在任之時勿入房山之境至正八年四月大旱公齋戒沐浴率僚屬耆老告天祈雨不旬日甘澍應秋七月螟傷稼公徧禱神祠越明日螟蟲盡抱草木而死是秋穀大熟民賴以濟

春勸農桑藝種得時栽植有法勉勵勤謹諭戒游怠冬
遇農隙設立學校使民讀書教知禮義比及三年田無
荒蕪盡皆開闢民有流移咸來復業廳宇寂然絕無爭
訟囹圄空虛盜賊屏息非才之過人遠甚孰能若是乎
一旦鄉邑耆宿孫榮王祥等會議曰朱公來則施仁愛
之風化去則民思其德澤雖古良吏無以過矣宜樹豐
珉表其異政僉曰固所願也於是進義副尉白紙坊大
使杜仲嚴儒學教諭王賢詣余以文為請不得已依行
狀之實蹟謹繫銘曰賢哉朱公性賦忠勁家傳清白身
修心正厯仕京都選擢邑令下車之初宣布明命均賦
省刑興利除病威振權豪仁愛百姓夏旱拜祈甘澍隨
應合境惟朴耄倪歌詠秋螟傷稼禱神致敬天威至誠
裁蟲盡屏戒農勿惰化民無競盜息獄空訟簡廳靜一
方遺愛百里流慶杜召德齊龔黃名並耆宿樹珉以紀
善政勸勉將來永
為鑑鏡同上

原儒學在縣東南隅儒林坊創於元延祐間

同上

原魏必復房山建學碑 聖元大一統憲章百王尊禮
孔聖加崇大成徽稱丕作新廟亶亶穆穆而又崇備禮
嚴誠惟首善新民以警風天下房山奠邦畿既載宅朔
方距都城百里任土置縣肇金源六葉隸名京畿曰奉
先朝廷因茲山改名距今餘百載迄未有先聖先師祀
至元甲午僉徽政院弭禮於時遴員中省幕卜縣英方
債隙地廣袤贏敏者再始潛心經度禮縣人也大德改
元俾直學料顯旬監縣雅勒呼宰宋世昌簿楊政尉茂
巴爾斯主吏鄭惟良咸自誦此則我職敢不敬應於是
庀工歲役禮偕縣人知湘潭州張汝楫輪楮幣以倡是
年正殿成明年神門成又明年祁人劉仲勉工塑像設
大成巍巍南面垂旒被袞充鄒兩公十哲序位左右侍
準古範陶祭器作器室春秋釋奠一如監學通祀儀大
德甲辰宰王傑簿史忠尉小云失隘殿地後不稱繼續

二畝有奇構明倫堂傑作治甚力甫畢及瓜延祐改元
春宰王元恕念惟兩廡未備考之故事從祀闕今歷年
所禮謂宜亟作治不爾待後視今猶今愴前也即與捐
俸入疏平昔交同志以相厥事合楮幣餘三千緡屬監
縣明安達宰元恕簿拜珠尉張彥澤起西廡庖湏內外
門墻未備者先是詔罷不急役議者謂方春事東作宜
弛廟繕修令與監縣已下相勵曰教化國家急務風俗
本原奈何廢弛矧是役也歛弗及民朽者梓者悉疇傭
以直陶者斤者悉物賈以售茲俾遂事則勸民以禮勉
吏以義孰敢忽諸於是趨者胥徒隸兵咸入役身泣之
不兩月煥然就叙繪從祀七十二大儒二十四新附十
賢儼像攝齊東西其冠冕服黼黻並取式監學應圖合
禮廟門夾兩翼致齋室內外按圖制悉具登降有度有
數士子觀廟事畢掌石局事張彬亦縣人也目擊心悅
欽服美事確碑廟庭請以是役前後發心之誠作用之
勤具載金石貽後人勿替今之功其勸善有在矣 咏

州志 按雅勒呼滿洲語內糴盆也舊作牙忽茂蒙古語不善之謂也巴爾斯即巴爾虎也舊作木八刺達滿洲語為首之稱也舊作答今俱譯改拜珠舊作伯佳今對音譯改

原文靖書院在房山縣西南七十里抱玉里元里人總管趙密宣德府教授賈壤嘗從容城劉因游歸以其學教鄉人乃建書院立祠祀之因以見其學之所從來元賜額曰文靖書院國子祭酒蘇天爵為記寰宇通志

臣等謹按文靖書院已廢今縣有雲峯書院乾隆

十八年知縣邱錦建

原大防山在良鄉縣西北三十五里山下有石穴又有

小防山與大防山相近

太平寰宇記

臣等謹按防山之防亦作房

增雍正八年正月二十日鳳凰集於房山之溝山峯

大清

一統志

增乾隆十八年

御製望大房山作歌 太行連延西南來千支萬派分

紆迴房山於此獨稱峻拔地秀擁金堂開盧水帶左拒

臣等謹按大房山

御製詩恭載首見之篇餘不備錄

原防山上有仙人玉堂

隋圖經

原房山在涿郡西北五十里北接居庸東抵漁陽西連

紫荆所謂幽燕輿室也

涿鹿記

原房山本中條之麓其山峻而且濶望之明秀異常宛

然如室

房山縣志

原大防嶺山下有石穴東北洞開高廣四五丈入穴轉

更崇深穴中有水耆舊傳言昔有沙門釋惠彌者好精
物隱嘗篝火尋之傍水入穴三里有餘穴分為二一穴
殊小西北出不知趣詣一穴西南出入水逕五六日方
還又不測窮深其水夏冷冬溫春秋有白魚出穴數日
而返人有採捕食者美珍常味蓋亦丙穴嘉魚之流類
也

水經
注

臣等謹按隋圖經云防山上有仙人玉堂或即水
經注所稱石穴者也

原孔水洞在大房山東北上有懸崖千尺餘下有石窟
濶二丈許泉水從中湧出深不可測唐胡詹作記云有
人篝火探之行五六日莫究其源但見仙鼠晝飛蘋鱗

時現

圖書編

原房山東北懸崖間有石竇如門中有積水人往往聞
絲竹音有好事者乘簞乘炬而入唯見石燕飛翔蘋鱗
澆澆行五六日無所抵恐炬盡而出金泰和中有桃花
流出其辨徑二寸俗呼為孔水洞

燕山
叢錄

原房山有孔水洞濶二丈許深不可測嘗有人秉火浮舟探之隱隱聞作樂聲懼而返金泰和中忽見桃花流出又有石經洞為隋靜琬法師鑿石刻經處以石門閉之累代皆有碑碣

獅山掌錄

原大房東北懸崖千尺石竇如門竇內泉水沸湧好事者嘗篝火乘桴探之行五六日莫究其源

長安客話

原孔水洞時有白龍出輒化為魚開元間旱每遣使投

玉璧金泰和中忽桃花流出辨如當五錢

帝京景物略

原頓銳詩 石竇水拖練靈源地絕塵浪傳飛白鼠無處隱蘋鱗入夏桃花盡經春荇葉新輕舸不可入豈有

避秦人

鷗汀集

原雲幪山直上皆石壁下有水湧出為孔水洞俗名水

簾洞舊有龍泉寺唐大厯中建今四壁刻劃佛像更萬

佛堂醜惡甚矣

北游紀方

原孔水洞在房山東北今謠為雲水洞

方輿紀要

朱彛尊原按雲水洞在上方山孔水別是一洞非

孔水謠為雲水也

增留臺尖山在房山縣西二里有泉石之勝

大清一統志

原龍城峪下有伏龍穴有湯泉

名勝志

增房山下有聖水泉山西南有伏龍穴一名龍城峪

大

清一統志

原唐房山湯記張嘉貞撰開元十五年四月立

輿地碑目

臣等謹按唐張嘉貞房山湯碑今無考

原大石岫在縣西南四十里黃龍山下前產青白石後產白玉石小者數丈大至數十丈宮殿營建多產於此

石峒下有塘突出一泉其水甚清流灌稻田米色如玉

人呼玉塘米

房山縣志

補嘉靖三十六年修復殿工命侍郎張舜臣主事李鍵

於大石窩采石

冬官紀事

臣等謹按縣志今石窩已淪入水中

增平峪山在房山縣西二百里峪中平坦有水環流石

田百餘畝

大清一統志

增三角山在房山縣西二百里山峯有三角

同上

原一堵塙山在縣西南四十里石壁巉峭高三百餘尋

長五百步儼若版築其下可容數百家

房山縣志

原紅螺山在縣西南四十里即幽嵐山山勢峻增諸峯

羅列如劍戟古刹存焉

涿州志

原紅螺嶮在上方山東三十里循九龍峪度八達嶺入

桃葉口為下嶮過龍潭水有洞曰紅螺為中嶮復上半

里其右松棚庵再右觀音洞為上嶮出嶮有嘉遜庵嶮

舊名幽嵐一曰寶金山

帝京景物略

原桃葉口俗呼黃山店

燕都游覽志

臣等謹按桃葉口今在縣西南二十五里

原般州山在縣西南四十里上有般州山寨

方輿紀要

原山有二寨石室環列

涿州志

原羊耳峪一名紅羊峪在縣西北十二里有大石高二

丈其形似象名象石

房山縣志

增中和峪在房山縣北十八里山腰有湧泉常流不竭

大清一統志

增三盆山在房山縣西北十五里山巔平廣約十餘畝
下有流泉三曲狀如仰盆三峯山在縣西北二十里三
峯並列高插雲漢

同上

原黃山去縣三十里上有玉室洞天

寰宇通志

臣等謹按黃山今在房山縣西北七十里俗傳漢
張良微時隱此亦名張良洞

原黃山店口在縣北三十里又西六十里曰大谷又三
十里即涑水縣北之乾河口也

方輿紀要

金定四八八二
原玉室洞天在縣西北七十里中有獨橋十八灘

房山縣志

原穀積山在縣西北五十里峯巒突起如積穀然下有

三石洞名曰三學中可容千人

方輿紀要

臣等謹按此洞皆石室中可容四五十人方輿紀

要云千人誤也

增半壁山在房山縣北三十里壁立千仞

大清一統志

增馬鞍山在房山縣北六十里兩峯特起而中凹上有

龐涓洞

同上

杏林之變態也

同上

原連泉山山巔有泉相連在縣西北三十里

涿州志

原大安山龍泉河出焉

名勝志

原大安山在縣北八十里山高險薛居正曰大安幽州

西名山也

方輿紀要

原奇羅陀在房山縣境東有萬壽寺俗呼天台寺相傳

寺有老僧日誦佛萬聲以豆記其數久之每誦一聲豆

輒自躍過人目為豆兒佛是時陳皇后浴於宮中澡豆

忽躍心悸有言及豆兒佛者迺出金錢建寺焉

析津日記

原公肅寄羅陀詩 一箇中斷水分流茅屋乘岩萬樹幽宛轉桃花堪問訊莫教容易放漁舟 問次齊稿

原韓姑砦俗呼韓繼村有香光寺寺右有唐寶積禪師

塔塔後為大悲閣萬厯二十二年賜藏經貯焉

北游紀方

增曾朝節勅建香光寺碑畧 大都之西百餘里房山之界有山名茶羅頂祖龍自花陀而來至是特然孤出南下為伏龍岡岡前萬家聚落村曰韓姑村之北有古刹基俗呼為少師園據殘碑乃唐寶積禪師所建香光佛刹也寺東有寶積遺塔訛稱為多寶佛塔廣孝姚公國初功臣爵至少師辭歸山林隱於太湖之華嚴寺朝廷恩賜香光花園為其別業久而荒廢萬厯戊戌奉命重修始事於二十六年春告成於二十八年秋九月

房山
縣志

原由韓姑砦而西從小徑入孤山口普濟寺道傍有元

應公禪師道行碑又有僧塔甚多不能遍覽也

國門近游錄

原唐順之普濟寺詩

宛轉雲峯合微茫鳥路通間來

竹林下醉卧石房中陰礪泉先凍陽崖蕊尚紅攀蘿探

虎穴憩石俯鯨宮上客思留帶山僧不避

曉夜深清嘯發流響入寒空

荆川集

原自普濟寺西行有村名別院田中一碑勒元色辰庫

魯克皇帝旨二道碑末書虎兒年月日碑陰為護持天

開中院記集賢侍講學士中奉大夫魏必復撰文并書

昭文館大學士榮祿大夫集賢院使廉簡題額循村又

西數里為歡喜臺

國門近游錄

原魏必復天開中院碑陰記天開古名刹在房山之麓規制始於漢歷晉隋唐迄五季盛於遼廢於金季之兵至元十年歲次癸酉應公禪師始來住持次建栗園寺次建皇后臺東西兩寺次建涿州設濟寺規模莊嚴擬於天開又建中院於寺南沙河按據上游創水碾三以給衆僧日饌費至元二十七年世祖皇帝聞而嘉之特賜聖旨護持應公既示寂遺教弟子趙顯仁住持延祐三年二月特授聖旨宗主大天開上方中院設濟等寺前後綸命顯仁鐫之琬琰

延祐四年歲次丁巳秋九月

增孤山口在房山縣南五十里涿易二州分路處

清一大

志

原循孤山口而西峯橫澗東澗上側徑如古牆趾人行村落十二三里至下接待庵兩壁巉截中隱一罅旋折東西望一平處曰歡喜臺行二里過兜率門一里得石級以升毘盧頂庵寺百餘有藥師殿華嚴龕珠子橋又半里則上方寺矣寺左一峯高百丈峯下泉曰一斗泉峯之有名者大小摘星峯望海峯

帝京景物畧

原自歡喜臺拾級而升凡九折盡三百級始達毘盧頂

上有寺百二十丹碧錯落嵌入巖際詩花種竹如江南

人家

徐文
長集

原孤山口西行約十二三里行篋游騎寄頓下接待院
歷枯礧二里許至山門榜曰兜率禪林又里許上石梯
二百餘級礧旁皆飛瀑宿漲挽鐵綆而上是為上接待
院倚壁皆僧舍又半里入上方寺左有一斗泉帖石山
房十笏以奉大士下有文殊洞上普賢洞外又有雲水

洞華嚴洞朝陽洞

游
業

原孤山普濟寺歡喜臺接待庵上方兜率院皆萬厯初
太監馮保修築各有碑兜率殿後刻四十二章經置於
壁筆法遒整不知倩何人書也

國門近
游錄

原上方寺一名兜率寺鑿石為磴攀鐵索而上絕頂有
泉如斗汨汨不窮旁有修竹千竿清冷逼人

燕都游
覽志

補上方兜率寺有蘋果園園中蘋果二株入秋結實
甚繁山僧不忍摘果既熟暈青紅色絕可愛法華經妙
莊嚴王言如來唇色赤好如蘋果果可謂善於喻物者

矣韞光樓
雜志

臣等謹按兜率寺蘋婆果樹今尚存

原由兜率寺西南行過十方院其旁僧塋甚衆中一塋
特高嵌有碑題曰六聘山天開寺懺悔上人墳塔記金
朝議大夫乾文閣大學士知制誥賜紫金魚袋王虛中
撰布衣賈溉書文稱師諱守常族曹姓易州新安府人
禮六聘山鐵頭陀為師住持本山三十年所度白黑四
衆二十餘萬以咸雍六年遷化塋建於大安己巳姑洗

月末書涿州邵師儒鐫

國門近游錄

原毘盧頂之右有一斗泉望海峯左有大小摘星陀極高峯後有雲水洞奇邃特甚至山腰則一百二十寺一

一可指數

長安客話

原摘星嶺在府西高入雲霄

紀纂淵海

原光啟時遼入侵幽州劉仁恭窮師踰摘星山討之

唐書

增盧龍節度使劉仁恭習知契丹虛實常選將練兵乘

秋深入踰摘星嶺襲之

通鑑

臣等謹按通鑑稱劉仁恭踰摘星嶺而唐書稱劉仁恭踰摘星山攷房山又名王母山見於元和郡縣志別無摘星之名記纂淵海及

大清一統志皆謂房山摘星嶺高入雲霄阮旻錫記謂峯之最高者為齋星陀亦謂摘星嶺也此嶺形勢獨勝故唐書遂以嶺名山水經注於聖水條下大房嶺與大房山通稱亦其例也劉仁恭欲襲契丹時踰摘星嶺以形勢所在深入乃可負固也

增舊志山在縣西北二十五里上有摘星嶺高入雲霄

有寺曰上方故亦名山

大清一統志

原阮旻錫上方山記 度廬滿徧房山而西到接待亭一望皆丹崖翠壁遊者捨騎扶筇逕旋步折得稍平處為歡喜臺前登覽率門兩峯壁立中砌石級鐵鐮高垂凡三轉至昆盧頂山中為剎七十有二寺之古者曰兜率創自隋唐多華嚴師遺跡峯之歧處為朝陽洞傳有白猿聽經於此洞中二泉澄泓可鑒毫髮山塢早龍潭龍去潭枯然纖塵不入峯最尊者為摘星陀華嚴於此齊星曰摘星訛耳僧巢其巔下如飛鳥然燕山紀游增姜宸英上方山詩 大房之山中條麓上方間鑿尤自古香界中藏百二十神仙窟宅誰能數幽逕初從轉姑砦連峯直接大安塢兩壁交攢天四圍一線中豁日卓午亂石崢嶸不可過深坑一塋那得取千尋瀑乾白

自垂萬歲枝枯綠尚吐仰看峰臺稍寬敞側尋鳥道轉
僂偃捫鐵居然綠壁燭攀厓不用杞山虎九盤級盡空
喘汗百丈峯高難接武中巖結構何宮苑諸山拱揖勢
若俯畫剝風翻五印宇法堂雷響六時鼓漫山楓葉自
嫣然閉戶擅樂誰作主拄杖獨到興更悠牽蘿雙映勇
可賈已知小級闢泉清未覺長齋厭茶苦天寒凍合畏
久留落日丁丁聞樵斧道人問我來
何期須待春生徧薺莊 姜西溟集

原孤山口東八里有東南西北甘池四村亦謂之長溝
谷西村之北水從石壁出凡七竇羅注為池上有河北
將軍廟既無碑記不知為何神也土人言池中生魚止
一目而涿州相近有水生魚重脣其味皆絕美然不多

得水從石橋過橋下苻帶冬月青翠可翫按鄺善長注
水經有甘泉水出良鄉西山東南逕西鄉城西而南注
疑即是水也村東北行數里為皇后臺黑龍潭其北即
六聘山山有天開寺寺中有元碑三其一從仕郎翰林
國史院典簿順聖魏必復撰并書至元二十八年立末
書石局副使李文秀鐫其一香山永安寺住持沙門惠
川福珪撰并書後至元三年四月立其一石經山雲居
寺住持沙門西源洪注撰并書至正十二年立又有陀

羅尼石幢字多磨泐無歲月可考

國門近游錄

臣等謹按六聘山在縣西南三十里俗亦稱綠屏

山

原僧福珪六聘山天開寺重建碑記畧國門之西兩舍之地有山曰六聘中有伽藍曰天開燕易間一鉅刹也自後漢迄有唐經五代厯遼金廢興難具載云天開者以寺前山谷天然開闢也吉金貞石志

原六聘山在房山縣西三十里

明一統志

原大房山南晉霍原隱處

名勝志

原涑水北逕小冀東又東逕大冀東益霍原教授處也

徐廣云原隱居廣陽山教授數千人為王浚所召雖千古世懸猶表二賢之稱既無碑頌竟不知定誰居也

水經

注

原霍原字休明燕國廣陽人元康末與王裒等俱以賢良徵累下州郡以禮發遣皆不到後王浚稱制謀僭使人問之原不答浚心銜之時有謠曰天子在何許近在豆田中浚以豆為霍收原斬之懸其首諸生悲哭夜竊之共埋殯之

晉書

補霍原少有志力叔父坐法當死原入訟獄代之楚毒
倍加終免叔父年十八觀大學行禮因留學焉貴游子
弟聞而重之初原以賢良徵累下州郡以遣皆不到也

王隱

晉書

原許猛為幽州刺史素服霍原之名將詣之主簿當車
諫不可出界猛歎恨而止原山居積年門徒百數燕王

月致羊酒

州府
元龜

原盧道將為燕郡太守下車表樂毅霍原之墓而為之

立祠

魏書

朱彞尊原按六聘山見於遼史見於寰宇通志及
明一統志近時士子多守廣輿記為兔園冊削去
不載人遂畧焉不考康熙癸丑登上方山見堯率
寺南十方院東有金大安中懺悔上人墳塔後十
四年復遊上方於孤山口西麥田中見有元延祐
間所樹碑則集賢學士魏必復所撰稱此地為六
聘山天開寺下中院又於甘池村北數里訪天開

寺尚存蓋當日寺僧管業其地甚廣天開乃其下
院孤山則下中院兜率為上方而總名之曰六聘
山天開寺六聘之義地志不詳疑即霍原教授之
地舍原之外無人足以當之矣

補劉因詩 西山霍原宅古跡猶可稽重吟豆田謠愁
雲落崩崖知幾在明哲何事繼塵羈君觀括囊戒無盈
庶無虧
靜修集

補北砦雙崖峭立澗流其中老樹千章瀑泉三疊注為
龍潭一禪宮一道院臨崖相望觀中有無名子題壁詩

云壁色壓潭黑林光漏日明傳聞老龍卧不敢濯吾纓

不知何年人作也

奧室記

補自上方山麓折而西至北砦雙厓如門琳宮梵舍對

峙左右老樹欹斜交蔭礧谷寒葉盈尺人行款款有聲

流泉三疊鳴空山中注而為池土人戒勿濯手濯則龍

怒雷電且至

竹垞文類

原甘池村東北十五里村曰瓦井過村有小庵中有元

時石幢字多磨泐去庵百步有僧塔七其一大書榮祿

大夫守司徒侍中宗主某大師靈塏字其餘六塏皆有
銘棘荆繞之字小不能讀也塔旁有石幢二又有石鐘

一鐘上亦有銘乃至元中物

國門近
游錄

增甘泉水在房山縣西北

大清
一統志

原甘池在孫家岡北石將軍廟前泉凡七孔平地趵突
流為長溝土人言廟下穴中有一目魚長可四寸每於

清明日出穴戲游見者以占豐稔

北游
紀方

原挾河出縣東南中浣谷流入涿州界

方輿
紀要

臣等謹按挾河在縣東南三十里與涿州良鄉交界發源縣之青龍潭東歸公村河亦名夾河

又按房山縣河道有由境內發源者曰半壁店河曰長溝河曰韓村河曰拊流河曰雅河其半壁店河上流一自西域寺出者為西域寺河一自白玉塘出者為白玉塘河白玉塘河至獨樹村會西域寺河注半壁店歸挾河其長溝河自上方山逕甘池等村歸挾河其韓村河上流一自禪窩水出逕

婁子水瓦井等村一自青龍潭逕龍門口村至南
章村匯為韓村河亦歸挾河其併流河上流有四
一自茶樓頂經山口等村者為壩兒河一自牛口
峪馬跑泉經顧冊等村者為涼水河一自西北荆
山經塔窪紅寺等村者為西沙河一自沙峪溝經
歇息岡北折而東者為東沙河至圪頭村東四水
交匯為併流河歸琉璃河其雅河自河西村逕南
公村入良鄉界有由境外發源者曰拒馬河曰大

石河曰啞叭河曰順水河其拒馬河自紫荆關來入房山境張坊村至上灘村東分為二一名風水新河由正子營西歸涑水縣一為東拒馬河由正子營東歸涑州拒馬河其大石河自宛平柳林入房山境長草村東南歸琉璃河其啞叭河自宛平潭柘寺入房山境石甫村至怪宅村歸良鄉界其順水河自宛平太倉嶺馬蹄泉入房山境北歸良鄉界此房山縣水道之大概謹附錄於此

欽定日下舊聞考卷一百三十

欽定日下舊聞考卷一百三十舉正

馬守恕原書訛作馬恕今據縣志改

元房山縣尹朱禮去思碑馬守

恕撰
文條

庀工原書庀訛作庇 陶祭器作器室原書脫三字

即與捐俸原書脫捐字今俱據縣志增改

魏必復房山建

學碑
條

八達嶺原書訛作入寨嶺今據帝京景物畧改

紅螺嶺在

上方山

東條

統志易縣隋開皇時已改為易州原書州訛作縣今

改

由覽率寺
西南行條

欽定日下舊聞考卷一百三十舉正

欽定四庫全書

史部

欽定日下舊聞考卷一百三十一至

詳校官庶吉士臣范逢恩

檢討臣德生覆勘

總校官進士臣程嘉謨

校對官進士臣單可璠

謄錄監生臣黃珩

欽定四庫全書

欽定日下舊聞考卷一百三十一

京畿

房山縣二

原聖水東逕玉石山謂之玉石口山多珉玉燕石故以

玉石名之

水經注

原迴城水源出良鄉縣西北玉石山東流經縣北四里

又南流入范陽縣界

郡國志

原十度河在縣之西南曲折旋繞由十度村至石峪店

歷經十度故名即拒馬河之上流也

房山縣志

原涿州永泰軍有大房山六聘山涿水樓桑河橫溝河

禮遜河祁溝河

遼史

原杖引泉在縣西南六十里泉水湧出匯而成溪流經

涿州東頭入胡良河

方輿紀要

臣等謹按杖引泉今湮塞

原公村在縣北三十里廣陽水所出經廣陽故城與鹽

溝水合入桑乾河有胡良河自縣北來注之

名勝志

原六山河自黑龍關來東南入琉璃河上有半壁山壁立千仞石罅古柏蒙茸然長不滿二尺其西山半一小竇曰辟穀洞峭絕不可上北為背陰洞對山望其東有

正覺洞

北游紀方

臣等謹按六山河因黃山穀積山半壁山辟穀山張良洞正覺洞朝陽洞諸水所會故名

增琉璃河源出房山縣西北東南經良鄉縣西南又東南逕涿州東又南入保定府新城縣界即古聖水也大

清一
統志

臣
等謹按

大清一統志琉璃河源出房山西北黑龍潭及孔水洞
俗名蘆村河入良鄉縣始名琉璃河范大成集中
謂之劉李河宋敏求入蕃錄謂之六里河

原黑龍潭在縣北五十里元至正中京師大旱遣留守都
事薩里默色禱之大雨霑足

涿州志 按薩里默色義
俱見前舊作薩理彌實今

改譯

原宣德十年五月天久不雨房山民言縣北七十里

有龍潭厯宋元以來禱雨輒應上命遣官祭之

明宣宗實錄

原歐陽原功創建黑龍潭廟碑記 房山之大安山山之上
有龍秋深不見底以勢度之下徹山趾世相傳有黑龍
君居之至正十年歲庚寅夏五月至六月不雨銀青榮
祿大夫中書平章政事綽斯戡奉詔留鎮京師召京尹
縣令等官偏走羣望又率僚屬詣在京名寺觀咸禱焉
雨不至平章公憂之歸家露香禱於庭左右曰房山有
黑龍潭禱雨輒應盍往扣之公遣留守司都事薩里然
色奉香幣行仍戒有司遣介貳王虛宮十一代真人
張公門徒明道洞微大師畢輔貴偕往既至輔貴等
憑平章公問雨之誠於龍明日龍見靈異觀者喜曰雨
之徵也既而大雷電以雨圻甸方數百里皆霑足稿苗
盡起及秋五穀胥熟於是父老以龍君未有祠請作新

廟以彰神庥輔貴願募衆財馮潭依山疊石築壇高二丈許廣可二百餘步因壇爲廟中作正殿三間東西屋如之外爲神門設闌楯臨壇上中塑龍神像服飾如貴者儀旁列雷雨部諸神次及祀神之庀守祠之舍內外階作經始於十年之秋落成於十二年之冬費楮帛五萬三千緡有奇十四年夏六月京師又踰月不雨公復遣薩里默色禱如前將行致公之意以廟記屬某時某感暑下痢連日病不能興聞命強起而默禱曰龍君即致甘澍已時當力疾以償諾責十三日壬寅往禱丙午大雨已酉又大雨自是雨大集是歲有秋都人每雨見風雲雷電皆起西南自房山來知爲龍君所致薩里默色竣事還以喜雨告某疾亦稍甦乃記之曰天有三垣帝座所在諸星環之國有京城天子所居百神衛之房山密邇燕都多深山修谷實生神龍疏附奔走居百神之先理之必然也且京師天下之本盛夏焦旬不雨舟楫不旣物賈日翔四方輻輳者憂之入旬日不雨饑

鍾疾疫將作居民憂之闕訟盜賊滋蕃朝廷有司憂之
一雨而百姓四方安故房山之龍能雨京師有功於國
甚大禮記祭法曰山林川谷邱陵能出雲為風雨見怪
物皆曰神有天下者祭百神諸侯在其地則祭之新廟之
作於祭法為宜或曰社壇而不宇今廟焉以居龍何曰
地載神氣神氣風霆風霆流形庶物露生社欲其露處
以受生氣也龍者天之生氣能為膏澤以生萬物者也
其質為陽陽動必靜靜必伏藏宇以棲神固宜又曰肖
龍象以人何曰龍有變化不測之神人而為龍龍而為
人古今多有之異時襲崇之典請於大庭議於奉常為
侯為公衣冠牲幣祀號祭式必視人爵廟也像也揆之
事理皆宜平章公蒙古克埒氏國初以來元勲世臣之
胄其父祖子孫羣從昆弟丞相御史大夫接踵不絕於
朝故其體國也切其愛民也深其禱神也能竭其誠乃
作迎享送神詩俾工歌其辭以祀并刻之石辭曰龍胡
為兮山之盤風氣固密兮罔壅綢繆龍奉命兮宅阻幽

庖帝室兮拱神州
神州兮盛夏不雨相臣憂兮奉牲醑
牲肥兮醑香龍來歆兮不遑處大振電兮從元冥雲飛
織兮雨建瓴雨優渥兮年穀熟兮神州足神州
足兮萬邦福龍盤桓兮此有屋龍啟起兮安之乘靈和
兮薄希懿風雨旗兮絕天河瀚元雲兮揚素波帝曰勞
女兮復女居新廟翼翼兮山盤紆房之山兮雨之府鼓
坎坎兮巫屨舞澤我民兮萬萬古國有秩兮食茲土
圭齋集 按克埒蒙古語墻也舊作怯烈今譯改

原李漁房山詩集 陰雲嫋嫋黑龍灣瑤草丹崖不可
攀越客漫誇天姥勝漁陽還有大房山 嵩渚集

原防水出良鄉縣西北大防山南東南流逕羊頭阜下

俗謂之羊頭溪

房山縣志

臣等謹按羊頭阜即羊頭岡見

大清一統志

原白帶山在范陽縣北四十里

太平寰宇記

原般州山西南十里為石經山山之東為石經洞

方輿紀要

原房山縣西南四十里有山曰白帶山生懋題草又曰

懋題山藏石經者千年矣故曰石經山亦曰小西天云

北齊南嶽慧思大師慮東土藏教有毀滅時發願刻石

藏閼封岩壑中坐下靜琬法師承師付囑自隋大業迄

唐貞觀大涅槃經成其夜山吼生香樹三十餘本六月

水浮大木千株至山下構雲居寺焉唐玄宗第八妹金仙公主修之洪武二十六年又修之正統九年又修之山上雷音洞高大餘四壁刻經四柱刻像前石有扉維以開閉几案瓶壺皆石臺有欄橫與堂亘堂左洞二右洞三堂下洞二皆經唐迄元代有續刻經目列石幢人傳洞火龍所穿也山下左右東峪寺西峪寺西峪寺後香樹林香樹生處也夢堂庵唐夢堂師居處也林後琬公塔也萬歷壬辰達觀和尚覩像設衰頽石版殘蝕率

寧思道碑一太極元年王利貞碑二遼碑一趙尊仁碑
一天慶八年沙門志才碑二元碑一至正元年賈志道
碑一至正二年釋法真碑山半有庵曰半山庵

帝京景物略

朱彞尊原按漢書地理志清河郡有懋題縣顏師

古注懋古莎字

增石經山在房山縣西南五十里本名白帶山亦曰懋

題山以山生懋題草也

大清一統志

原獨樹村在縣西南五十里

房山縣志

南有石堂東向方廣五丈曰石經堂堂有几案壚餅之屬皆以石為之下以石甃地使平壁皆嵌以石刻佛經字類趙松雪中四石柱柱上各雕佛像數百飾以金碧堂之前石扉八可以啟閉外有露臺三面以石為闌設石几石床以為遊人憩息禪房庖湑皆因巖為之堂左石洞二右石洞三復有二洞在堂之下石經版分貯其中始隋沙門靜琬其徒道公等續之至遼統和金明昌間增刻前後納洞中石凡七百餘條有石幢記其目每

幽州節度使劉濟所建西偏下五里許有雲居寺亦靜
琬所創塋中列唐人建石浮屠四皆勒碑其上其一開
元十年助教梁高望書其一開元十五年太原王大悅
書其建於景雲二年者則寧思道所書太極元年建者
則王利貞書也寺僧言後院中石刻猶多在榛莽中或
立或仆多唐時所刻

雙崖集

增隋石經開皇中釋靜琬鑿石刻經僅成大涅槃而卒
唐宋皆有續刻唐雲居寺石浮圖銘王大悅撰開元十

五年唐雲居寺石浮圖銘梁高望書開元十年唐涿鹿
山石經堂記劉濟撰元和四年遼雲居寺續鐫石經記
趙遵仁撰清寧四年遼雲居寺續祕藏石經塔記沙門
志才撰天慶八年元修華嚴堂經本記賈志道撰并書
至正元年元雲居禪寺藏經記釋法貞撰陳顥篆額至

元二年

天下金石志

增靜琬姓氏里居不可考訪求名勝至燕涿山北白帶
山見峯巒靈秀遂採石造十二部石經自隋大業迄唐

貞觀大涅槃經成是夜山吼生香樹三十餘本六月水漲忽浮大木千株至山下因構雲居寺明皇第八妹金

仙公主增修今香樹林後琬公塔存焉

畿輔仙
釋志

原石經山峯巒秀拔儼若天竺因謂之小西天寺在雲表僅通鳥道曰雲居寺迤南三里有石級長里許級盡東折為雷音殿四壁鐫梵語悉隋唐人所書復有洞七即知苑藏石刻處也

長安
客語

臣等謹按雲居寺內恭懸

御製遊雲居寺即景雜詠恭載卷內

又按長安客話所稱隋沙門知苑隋圖經亦作靜

琬

原幽州沙門知苑精練有學識隋大業中於幽州西山
鑿巖為石室摩四壁以寫經又取方石別更摩寫藏諸
室內每一室滿即以石塞門鎔鐵固之時煬帝幸涿郡
內史侍郎蕭瑀皇后弟也性篤信佛法以其事白后后
施絹千匹瑀施絹五百匹朝野聞之爭共捨施故苑得

成功苑常以役匠既多道路奔走欲於巖前造木佛堂并食堂寢而念木瓦難辦忽一夜暴雨震電明旦既晴見山下有大木松栢數千為水漂積於道次道俗驚駭不知來處苑乃使匠擇取其木餘分邑里邑里喜悅助造堂宇頃之畢成苑所造石經已滿七室以貞觀十三年卒弟子繼其功焉

冥報記

原智泉寺僧靜琬見白帶山有石室遂發心書經十二

部刊石為碑

隋圖經

原石經貯於巖洞者七地穴者二洞以石門閉之穴以
浮圖鎮之自隋唐迄元碑碣森列洪武二十一年正月
道行奉命往觀賦詩鐫於華巖堂之壁雖未足彰琬師
之幽光庶以紀茲行之歲月而托不朽也

逃虛
子集

增乾隆十八年

御製初遊雲居寺二十韻 明發事清遊村烟淡靄浮
欲暄春旭麗不冷曉風收歷歷遵原陌行行度野溝杏
含紅見遠柳怯綠疑偷近識花原未明看枝已柔問誰

開謝墅聞說是菟裘

過一山村松竹滿酒間之為故尚書傅鼎別業

入谷蹊偏

隘尋逵騎半留村民瞻露冕緹士漫鳴騶恍到琉璃界
分迎雲水儔行營剛廿里古寺閱千秋碑宇傳貞觀蓮
經悟比丘莊嚴信希有名象許詮不滿灑坐精舍檐楹
揭素幃藉因休衆倦便以縱晴眸僧進伊蒲饌鶴彈梵
咽喉此來探勝賞詎為訪禪修經洞猶雲表岷途有瀑
流要憑窮一覽未便更他投曩者遙瞻企佳哉今取酬
佛寧擅獨樂我祇勵先憂

增又

御製遊雲居寺即景雜詠 拈花微笑那傳心般涅槃

成離

去聲

古今可惜闍黎多附會未知大地是香林

右香樹林

唐刻涅槃經成山為三吼因生香樹云

雲居已據勝概雲最佳致疎軒

納遠望躋陟得清寄流憩倚丈榻屬詠托遐思籟聲泛

金石塔影落空翠分付舍利光記予乃初至

右概雲軒

竹

樹葱翠間峰腰涵玉乳山靈泉必靈名言傳自古抱珠

守蒼龍雲氣時吞吐流為功德水香積悅法侶何當合

膚寸徧作春郊雨

右石井

預慮昌黎論先為二酉藏義

都兼半滿世已閱隋唐局輪真稱固法輪豈繫常擬方

杜元凱猶覺欠周防

右石經洞隋僧靜琬藏經處

空閣凌飛崖虛

舟意彌在英英忽滿谷依稀泛雲海

右崖舫

絕峭忽畝

平北洞依陽瞰何年耆闍窟中闕三車典空色難為方

喧寂信皆善大士坐如如萬劫法輪轉隨喜欣始過於

斯會不淺

右聲輪洞

搏壁思少徐孤亭恰逢此騁望無端

倪棲神冥議擬春從何方來踪跡無可指忽見桃始華

輒以名亭子

右見春亭 山崖有亭初無名忽見桃花始開因以名之

土門通細

逕絕頂憑陵高石經藏洞底將曝母乃勞天龍不禁笑

安名慣爾曹

右曝經臺

臣等謹按雲居寺

御製詩謹繹有關紀述者恭載卷內餘不備錄

原姚廣孝題石經山詩 我我石經山連峰吐金碧秀
氣鍾慈題勝槩擬西域三墳五千卷華言百師譯琬公
懼變滅銀筆寫蒼石片片青瑤光字字太古色功非一
代就用藉萬人力流傳鄙簡編堅固陋板刻深由地穴
藏高從岩洞積初疑神鬼工迺著造化迹延洪勝沒冢
防虞猶孔壁不畏野火燎詎愁苔蘚蝕茲山既無盡是

法寧有極如何大業間得此至人出幽明獲爾刊乾坤
配其德大哉洪法心吾徒可為則 逃虛子集

原薛蕙詩 翠嶽雙林合丹梯一徑懸洞門窺地底石
室與天連文字閒龍藏金銀布梵筵茲山寶靈異吾欲

托栖禪 西原集

原蔣山脚詩 金筵初布地玉宇舊藏經石室青霞護

松門白日扁洞街多宿霧巖俯四垂星未厭探奇意虛
疑入宵冥 南泠集

原張猶占登小西天石經寺作 摩圍西望渺塵沙天

竺重開帝梵家十里雲盤藏石磴千峰露濕白蓮花山

懸寶象秋宜月洞鎖靈文夜有霞聞說叢
林堪卓錫願從初地轉三車 嘉樹齋集

原幽州石浮圖銘甯思道書景雲二年四月立又石浮

圖頌王利貞文太極元年四月立

金石文
字記

原王利貞易州石亭府左果毅都尉薊縣田義起石浮
圖頌祥夫釋氏大慈能仁廣運一揮惠劍則結嶽峰
摧整駕寶船則流海波息若過豐牛步坦香象登津福
社夙昭解行先備非功德修淨其有與於此乎浮圖主
石亭府果毅田公者孝乎惟孝忠為令德秉武腰文遊
仁踐義富潤石室貨積銅山保性里閑榮足知止尊崇
法門福求無上奉為七代先亡見存太夫人合家大小
敬造石浮圖七級釋迦像二菩薩神王等一鋪爾其索
寶幽谷獲琰崇巖異濟北之神期匪河西之馬瑞歛焉
構迴不日而成狀在離之從天猶多寶之湧地虬簷霧
舉寶鐸風吟眸容如在神儀儼若昃朝日以舒鑒燦幽
宵以放光與惠日而長懸同定水之無竭贊嘆功德而
述頌云惟佛與佛法所皆空能仁富智廣度多功有清
信士產積豐崇檀波羅密琬琰雕龕輪高擢露鐸迴吟
風眸穆如在與天地終福霑一切於何不隆和州歷陽
丞王利貞文弟燕州大雲寺僧智崇妹明度寺尼護念

弟義冲陪戎副尉上柱國弟義隆昭武校尉上柱國
雍州興國府右果毅都尉合家供養 吉金貞石志

朱彞尊原按包咸論語注孝乎惟孝美大孝之辭

今碑文亦同此讀

原雲居寺石浮屠銘梁高望書開元十年四月立

金石文
字記

原梁高望易州新安府折衝李公石浮屠之銘 夫至
道潛運不言而化成大象乎靈不宰之功遂斯則神元
妙顯雖日用而莫知况耳目不該豈視聽之能識由是
給園多士並赴緇林方丈比丘咸歸奈苑有想非想住
法非常樂之宗色空即空生滅豈菩提之果於是清信
士易州新安府折衝都尉李文安避心正覺妙達苦空
知勞生之有涯設津梁於彼岸過於范陽縣西雲居寺
為亡妻河東郡君薛氏敬造石浮圖一所旁求琬琰

岫為之獻琛遠召良工班輸以之呈巧盤螭隱伏與雲
峰而相交靈鳳將翔共陽鳥而接翼飛空七級狀多寶
之移來騰虛四迴疑衆仙之涌出兼以山含萬象地蘊
靈竒蓮沼澄光似猴池之浴日松枝引籟若祇樹之吟
風衆妙難名約數厥美冀同拂石萬劫茲山銘曰麗哉
弘壁出矣崑山磨礱不日神儀婉然亭亭淨域哉哉給
園光浮十界色照三天衆妙功德莫惟斯重鏤鳳傍橋
雕龍上聳買地有巢福田無種利益潛通存疑偕奉易
州府遂城縣書助教梁高望書
開元十年四月八日 易州志

原寺門右石浮屠銘太原王大悅撰并書立於開元十

五年二月

燕都遊覽志

原王大悅石浮圖銘序畧 建浮屠於門右者鄭氏字
元泰范陽人本易爐滅土亦塵散惟石之永瞻具有恒

繫法之堅念茲無替銘曰高塔我我示延遐矚多生攘
攘動善羣觸茲設茲利無礙無疆其福豐衍其資廣長
彼石惟堅我性亦定永永不
滅視以知正 吉金貞石志

原山頂石浮圖後記王守泰行書開元二十八年四月

立

金石文
字記

原王守泰記 山頂石浮圖後大唐開元十八年金仙
長公主為奏聖上賜大唐新舊譯經四千餘卷充幽府
范陽縣為石經本入奏范陽縣東南五十里上城村趙
襄子淀中麥田莊井果園一所及環山林麓東接房南
嶺南逼他山西止白帶山口北隈大山分水界並永充
供給山門所用又委禪師元法歲歲通轉一切上延寶
歷永福慈王下引懷生同攀覺樹粵開元二十八年庚
辰歲朱明八日前莫州吏部常選王守泰記送經京崇

福寺沙門智昇檢校送經臨壇大德沙門秀璋都檢校禪師沙門元法 吉金貞石志

原涿鹿山石經堂記唐節度使劉濟撰元和四年立

燕都

游覽

志

原碑後有節度押衙銀青光祿大夫檢校國子祭酒兼監察御史上柱國姚可矩弟攝歸順州參軍可恭盧龍

節度驅使官可質咸通十三年四月題名

國門近游錄

原劉濟涿鹿山石經堂記

我唐十有一葉皇帝繼明

昭宣光被四海神人以和逮今已丑歲凡五祀矣方隅守臣樂其休明天地大德罔知攸報濟封內山川有涿鹿山石經者始自北齊至隋沙門靜琬睹層封雲跡因

盧龍節度驅使官張景琮書并篆額咸通八年丁亥歲

十一月四日建

國門近
游錄

原何籌律大德道行碑畧 大德諱真性涿郡范陽人
元和中廉察使相國彭城劉公慕其高行亟請臨壇暨
太和九祀方伯司徒史公之頌戎也並傾南望之誠兼
陳北巷之敬奇香異藥上服命衣使命往來難可稱計
以其年季秋示寂於本寺東院工足仲說恒智鑒真惠
增志十文展寶定等七人感師之教焚棺於碧岫之陽
起塔於清流之左議刻貞珉紀其盛德俄屬先朝大興
沙汰寺皆毀廢僧遁林岩洎佛法重興屢更星歲七人
之內惟寶定存乃與寺主僧弘
信再議崇立焉 吉金貞石志

朱彝尊原按碑稱廉察使相國彭城劉公者節度

使濟也其曰方伯司徒史公者留後元忠也

原王正燕山雲居寺碑 雲居寺東一里有高峰峰之上十餘步有九室室之內有經四百二十萬言本自靜琬始厥謀厯道暹諸公成其事佛宇經厨僧房鐘閣材惟杞梓砌則琳珉古檜星羅流水環遶闕堤相望門闥洞開風俗以四月八日共慶佛生凡水之濱山之下不遠百里預饋供糧號為義食先是唐千年寺主譙諷和尚為門徒時僕自皇后臺披褐來遊論難數宵於道相得自茲一別僕以職倅於瀛掌記於武定廉察於奉聖陟在憲臺遷在諫署佐茲邦計迨今十五年復會於茲寺和尚建庫堂一座五間六架廚房一座五間五架轉輪佛殿一座五間六架暖廳一座五間五架又化助前燕王侍中蘭陵公建講堂一座五間七架又化助公主建碑樓一座五間六架并諸腰座次建飯廊一十三間四架次又建東庫四間五架次建梵網經廊房八間四

祭次蓋後門屋一座餘有捨短從長加米施粉周而復始不可殫論乙丑歲天順皇帝御宇之十五載丞相秦王統燕之四年泰階平格擇明八風草偃四海鏡清和尚慶凡得時懇求作記僕以謙諷等同德經營協力唱和結一千人之社一千人之心春不妨耕秋不廢穫立其信導其教無貧富後先無貴賤老少施有定例納有常期貯於庫司補茲寺缺寺不壞於平地經不墜於東峰稽首靈巖載銘貞石鹽鐵判官朝議郎行右補闕賜緋魚袋王正述前鄉貢進士鄭熙書房山縣志原沙門智光重修雲居寺記應歷十四載寺主謙諷完緝一寺結邑千人請右補闕瑯琊王公正作碑頌因兵火遂至傷缺補闕子諸行宮都部署判官都官員外郎賜紫金魚袋教念先人遺跡出俸錢再修以釋智光乃考之孰友也故命刊述勒之時睿德神畧應運啟化承天皇太后至德廣孝昭聖皇帝御極之二十三年統和乙巳歲八月丁丑朔十一日丁亥記同上

輔皇帝五年四月上尊號曰至德廣孝昭聖天輔
皇帝二十四年十月上尊號曰至德廣孝昭聖天
輔皇帝今碑建於二十三年尊號無天輔字是則
二十四年十月以前聖宗尊號但云至德廣孝昭
聖皇帝如碑所記至二十四年乃合元年尊號天
輔字以稱之否則二十四年所上之號與五年無
異何用羣臣復上乎竊疑史有誤也

原沙門志才涿鹿山雲居寺續秘藏石經塔記 古之
碑者用木為之乃葵祭饗聘之際所植一大木而字從

石者取其堅久也秦漢已降凡有功德政事亦碑之欲
圖不朽易之以石雖失其本從來所尚不可廢焉浮圖
經教來自西國梵文貝葉此譯華言盡書竹帛或邪見
而毀淫或兵火而焚焚或時久而蟲爛孰更印土求諸
與有隋沙門靜琬深慮此事厲志發願於大業年中至
涿鹿山以大藏經刻於貞珉藏諸山竇大願不終而奄
化門人道公議公暹公法公師資相踵五代造經亦未
滿師願至遼劉公法師奏聞聖宗皇帝賜普渡壇利錢
續造次興宗皇帝賜錢又造相國楊公遵勗梁公頴奏
道宗皇帝賜錢造經四十七帙迺前上石共計一百八
十七帙已厝東峰七石室內見今大藏仍未及半有通
理大師緇林拔秀名實俱高教風一扇草偃八絃其德
餘業俱載寶峰本寺遺行碑中師於茲山寓宿有續造
念興無緣慈為不請爰至大安九年正月一日遂於茲
寺放開戒壇士庶道俗入山受戒巨以數知方盡暮春
始得終罷所獲錢施乃萬鎰付門人右街僧錄通慧圓

照大師善定校勘刻石石類印板背面俱用鐫經兩紙至大安年錢已盡功且止碑四十八片經四十四帙題名目錄刻如左未知後代誰更繼之又有門人講經沙門善甄念先遺風不能續扇經碑未藏或有錢壞與定師共議募功至天慶七年於寺內西南隅穿地為穴道宗皇帝所辦石經大碑一百八十片通理大師所辦石經小碑四千八十片皆藏瘞地穴之內上築臺砌碑建塔一座刻文標記石經所在房山縣志

增遼趙尊仁碑畧燕都之有五郡民最饒者涿郡首焉涿郡之有七寺境最勝者雲居占焉寺隋朝所建號自唐代所賜山在郡之西北五十里寺在山之陽寺之東有峰最高故曰東峰峰頂上有石室七焉經貯是室先是太平七年會故樞密直學士韓公紹芳牧是州因從政之暇命從者遊是山詣是寺陟是峰暨觀遊間乃是石室內經碑且多依然藏貯遂召當寺耆秀詢以初迹代去時移詢無知者既而於石室間取出經碑驗名

對數得正法念經一部全七十卷計碑二百一十條大
涅槃經壹部全四十卷計碑一百二十條大華嚴壹部
全八十卷碑二百四十條大般若經五百二十卷碑一
千五百六十條又於左右別得石記云幽州沙門釋靜
琬精有學識於隋大業中發心造石經一藏以備法滅
遂於幽州西南白帶山上鑿為石室以石勒經藏諸室
內滿即用石塞戶以鐵錮之其後雖成其志未滿其願
以唐貞觀十三年薨化歸真門人尊公繼焉尊公沒有
儀公繼焉儀公沒有退公繼焉退公沒有法公繼焉自
琬至法凡五代不絕其志乃知自唐以降不聞繼造佛
之言故將見其廢耶一省其事喟然有興復之嘆以具
上事奏於天朝我聖宗皇帝銳志武功留心釋典暨聞
來奏深快宸衷乃命故瑜伽大法師諱可元提點錫修
勛訛刊謬補缺續新琬師之志因此繼焉迨我興宗皇
帝之紹位也孝敬恒專真空夙悟常念經碑數廣匠役
程遙藉檀施則歲久難為費常住則力乏焉辨重熙七

年於是出御府錢委官吏貯之歲析輕利供書經鐫碑之價仍委郡牧提點自茲無費常住無藉擅施以時繁年不暇鐫勒自太平七年至清寧三年中間續鐫造到大般若經八十卷計碑二百四十條以全其部也又鐫到大賢積經一部全一百二十卷計碑三百六十條以成四大部數也都總合經碑二千七百三十條清寧三年五月十二日大賢積初成郡守蕭公諱惟平召余謂曰四大部經今續鐫畢見聞之下幸會攷難願製好詞以為刊記余因愧孱蕪直以為記清寧四年三月一日記同上

增釋法真石經山雲居寺藏經記畧元之有天下列聖相繼崇重佛法琅函玉軸列刻爭輝仁宗御宇尤篤深信萬幾之暇躬親討論鐫印經相版建招提皆設官以董之銀青榮祿大夫中書平章政事闕億宗闕等院使明琦揀阿時為親信大臣特承顧問凡所以宏護佛氏興隆三寶者公益有力焉聞房山之東峯有石經廠

積甚懋而長老歸源雲公適任住持公故臨觀馬徘徊
顧眺愛其山水奇秀寺宇靜深可為皇家祈福之所而
藏教缺然僧徒無以轉讀歸以是奏得經律論一大藏
藏於寺殿後輔相累朝大節益著四海蒙德澤者益亦
有年當天恩初公實預大策以佐命元勳入中書領今
職其豐功盛烈銘之鼎彝大書國史而眷眷佛門為之
金湯以護法為已任吾曹久知其自矣今住持長老
行澤號藏山前以公疏勸請主京之竹林竹林舊刹也
既積弊廢公嘗為奏得田五十頃以施選名僧居焉澤
住持此四年補葺罅漏修飾寺塔及退席而來是山亦
公之蔭念無以旌厚德具石乞文於余余以山澤之隳
為學孤陋烏足以應來命第惟山野開法之初公實奏
御抑與藏山為昆仲
義不得解 同上

增賈志道重修華嚴經本記畧 至正改元夏四月有
高麗國僧名慧月者因禮文殊大士於五臺衲衣錫杖

幽然脫俗經房山縣西鄉里東峰古刹名曰小西天華嚴堂其堂并華嚴經本等十二部皆石為之蓋有年矣歲月綿延住僧雲至堂摧經剝者有之存基址焉慧月留止於此憫其石戶摧圯經本殘缺幸遇資政院使資德大夫龍卜高公匠作院使大夫黨殊申公慧月拜禮詳陳其事公等允其言布施淨財千餘緡命慧月施勞董工修石戶經本不月餘而俱修至正改元夏五月初八日立石 同上 按黨殊舊作黨住今對音譯改原釋德清涿州石經山雷音窟舍利記畧 有明萬厯二十年壬辰歲四月庚寅朔十有五日甲辰達觀可禪師自五臺來送龍子歸譚拓聖母慈聖宣文明肅太后聞之遣近臣陳儒趙斌等送齋供資五月十二日辛未攜侍者道開法厲如奇如印等至石經山雷音窟窟內有大業中靜琬石刻經所師見窟中像設攤赦石經溝蝕因命東雲居寺住持明亮芟刈之是日光燭巖壑風雷動地翌日啟洞中拜石石下有穴穴藏石函縱橫一

捐俸錢相助遂復舊觀

燕都遊覽志

原東峪西峪兩寺石經洞之左右翼也

同上

原東峪寺門白楊成林風氣慘裂北臺如蓮花在水中

央東臺亦奇特臺上石浮圖唐金仙公主所建五臺之

外環以巨嶂其石紋或類雨點或類卷雲

滿碧堂集

原從南臺而下山麓間有寺曰西峪寺東溪水濶可五

丈聲潺潺若風雨驟至五臺僧皆穴處遊人不可留多

憇此寺

長安客話

欽定日下舊聞考卷一百三十一

欽定日下舊聞考卷一百三十一舉正

靜琬原書琬訛作杭今改

出獨樹村
四里條

遐邇原書邇訛作爾今改

劉濟涿鹿山
石經堂記

欽定日下舊聞考卷一百三十一舉正